

童山詩集

童山詩集序

天下之理常順而文章恆以逆而成水之就下勢則然也風撓之石倚之迴曲而紋生激盪而濶汎其蹙縮複疊必有奇峯峭岫出乎其間是殆文章之示象也乎士生早掇科第取富貴終其身偃仰廟廊發爲詩文玉節而金和宜爲世楷則矣徐按其中則體勢平易雖紆徐淡衍求其感動人之心魄欲置不能者罕矣蓋境順則氣順奇峭之思無由振刷以出也吾友李君雨村生峩眉秀異處卓犖自負於書無所不讀發爲詩歌欽崟磊落肖其爲人弱冠中乙科三十而成進士授庶常旣而

改官文選主事君素不好吏事獨以翰林爲易讀書旣
不得以此終則又往往以詩自雄雖悲詫不形然其中
鬱折往復之致多矣歲己丑遭尊人石亭先生大故先
生爲北路同知攝密雲事其殁也雖山疾病亦有憂患
迫之使然者雨村力疾居喪振擗後事艱難恒悼半載
之間得詩二百餘首皆以寫其悲哀靡訴之情余三復
其詩泣然閔然而告之曰令觀全集大矣美矣而就其
大指論之改官後工於翰林時近作則又工於改官時
非所謂逆則成文非有無慘不平卽不能出奇以驚世
者耶雨村亦相視而笑以余爲知言嗟乎余之好爲詩

類雨村而處境拂逆視雨村尤甚顧余詩多平易近情
語遠不逮雨村是則撓之掎之蹙縮複疊而不能成交
亦天性所限然也余方將請假南歸雨村亦於秋杪歸
蜀因爲序其詩以志別昔東坡答王定國寄詩深美其
藝之進而云窮人之具將以交割與公余於雨村亦云
然矣己丑夏四月新安愚弟程晉芳序

童山詩集卷一

綿州李調元甫村

戊辰

雜興

衣冠入保國相驚以爲怪
繩被以禮文其苦如縲械
人固安所習改飾終不愛
假使我輩保豈復成人類
陶人使爲治鑄器必不良
治子使爲陶瓦合必相妨
茅茨與土堦後王無此殿
玉杯與象箸前王無此宴
所以古聖人因時隨俗便

人身一小天天道固難曉
五官不列眉眉胡王壽考百

體不止面。向胡獨要好。須胡分男女乳。胡分大小耳。目胡不倍。手指亦可少。何不去閒毛。亦可添牙爪。天道多遺憾。何況人身貌。自身尙不知安用。叩蒼昊。所以性理書徹底未明了。

楚王愛細腰。餓死了。不畏太真號。肥婢臨死猶涕淚。無鹽入齊宮。轉取人所棄。昭君在漢。宰反使走胡。地有愛眇目者。反怪雙目。備有愛半面者。轉笑全妝。累人情好。女色愛憎亦多異。無怪歷代來忠姦互倒置。

佛氏談因果。來世生福地。幾見初生人。盡記前生事。老子稱太上。長生應在世。何以血肉軀。飛昇不見墜。吾儒

陳追遠禮重宗祖祭追封拜墳頭安知魂果至人睡言
小死所異在無氣如與睡真同死亦可不淚

鵲巢而鳩居皆謂鳩不如然亦各有長未可定贏輸鵲
固善營造鳩亦善生雛無巢身可寄無子室空虛一乳
鳩子七問鵲可能乎

牧童有何道黃帝拜問之項橐有何知仲尼以爲師劍
必敵萬人乃可試其利詩必參百家始免後人議自以
爲是者安望傳後世

斥鷃爲鵬笑所爭九萬里使鵬穿叢林或恐不如雉鷄
螭避雨遷苦爲龍所使令龍穿曲珠或恐遜於蟻物固

各有宜不必兩皆美猿猱善登山鷗鳬工涉水長笑土木偶相爭兩非是

驪龍伏九淵誰敢攫其胡愚夫遭其睡乃得領下珠鷗鳥居海上日與人相嬉智者謀獲之一去不復隨失者多由智得者多由愚

偶聞人不潔無不爭掩鼻不知五穀生皆自糞壤出偶見兒啼聲無不厭且瞋不知百年人俱自孩提成流芳須百世前愆乃可蓋遺臭萬年者恐不如兒輩奈何遂臭夫紛紛史策內

遊山

遊山如讀書二里當一葉山行數百里日與異書接生
令清卷氣充腹復浮頰吐出遊山詩清若風生聳人言
我看山胡不攜卷帖雲烟供染翰初不借鼓篋不知讀
書人內外同涉躐山乃外之書奇文各領愜書乃內之
山揔架仰重疊內外皆有書何用書自挾善讀卽善遊
理不隔肩睫譬如多金人飽載馬駝躡豈在露財寶豈
不妨盜劫君莫笑出門外書趨蹌躑君莫笑閉戶內山
恣漁獵君看萬卷樓只作萬嶂蝶

蜀樂府十二首

荷池引

爲蜀王近侍嚴蘭珍也蘭珍華陽人父椿茂邑
諸生蘭珍工書法年十六與同邑齊飛鸞許若
瓊李麗華同選入宮甲申十一月賊攻城急蘭
珍投西院荷池死

銀塘昨夜芙蓉泣錦城將染黃巢血一聲鼙鼓動地來
滿宮粉黛無人色妾家華陽絕世姝豆蔻花梢二月初
曾侍吾王供酒翰肯教辱賊佐校書塵土蔽天血流水
惟有荷花嬌無滓誓將亭亭不汚身封花先向王前死
池水漻漻今幾春夜夜秋風吹白蘋香魂雖杳遺墨在
隻字珍於魏夫人

御溝怨

爲齊飛鸞也甲申十二月朔王同周貴妃白綾
端和殿飛鸞躍入御溝死是時又有成都王至
澍至淶同日投宮中八角井死

羣豬進城城南閉城頭大呼屠伯至紛紛宮女出王宮
鼠竄不復分雌雄蜀王已縊端和殿貴妃從死色不變
八角井中二王殉又見御溝鐵女人鐵女人是何名齊
飛鸞面如生可憐身死名不死人傳姓氏留青史向來
奔出誰家女

銀瓶擊

爲許若瓊也王薨之日賊入宮潛據逆閹王宣
執瓊獻賊僞封皇后夜半宴寢宮呼瓊侍酒酒
酣瓊執席上銀瓶擊獻賊額賊大怒戕瓊右背
瓊以左手搏賊賊又戕左罵不絕口賊衆驚之
礮車轟轟城門開賊如虓虎四門來黑雲壓頭洒紅雨
哭聲震天門已啓此時阿瓊在何地別藏荆軻抱仇志
官中歌舞夜偏長恨無七首乘賊腫席上銀瓶當利刀
一瓶擊去腦流膏賊大恚羣賊至刀兵齊下截兩臂雖
折兩臂終完名今日方知許飛瓊

漢殿仙

爲李麗華也麗華幼慧父友許寬義冑以吳江
月令對華應曰漢殿秋其家因呼爲漢殿仙賊
旣破蜀宮幽鎖密處華絕粒五日不死十二月
六日吞金卒年甫二十歲以上見遂寧張氏聞
幽錄亦軼聞也故歌以紀之

天上結璘奔月女降下人間作如子曾從廣寒宮裏生
誓向逆賊營中死赤眉去黃巾來金粟茹玉顏頰地下
旣無乾淨土仍奔月窟上天去

老神仙

爲陳上慶作也鄧州人初爲塑匠自言從終南

山道士授禁方四頁能爲人接骨續肢無不神效曾爲孫可望接活美人又活白賊養子賊中皆呼爲仙獻賊有愛婢曰老脚能字文書誤入洞見臟腹命醫之七日而活賊喜疊几爲臺使登几頂令衆羅拜封爲老神仙賊誅後從李定國至平越病死蜀人劉文季蒞親見之屬方邵村卓咸爲記因歌之

我聞神仙愛官職不聞神仙亦從賊何來塑匠亦稱仙公然與賊爲賓客自言曾到終南山乞得仙書洞裡還中有禁方纔四頁接骨換肢噀吸間不知何時賊兵至

擄在營中作醫士，簣中已起孫美人。陣上又活白兒子，
三千粉黛列如雲。就中老腳能掌文，無端遷怒刃傷腹。
洞見肝腸賊欲哭，呼聲一片傳仙至。莫謂我刃鋒不利，
半夜纔敷白水膏。平明依舊紅妝侍，從此賊聲歡沸天。
築臺羣拜老神仙，萬几疊梯高不墜。老神仙名天下傳，
如此名醫不醫國。却去賊中醫首賊，我欲殺仙報蜀仇。
惜哉仙死賊亦殛。

狗皮道士歌

狗皮道士不知姓名，以乞丐爲生。嘗着狗皮學
狗吠，故名。每侮獻賊賊入成都，嘗擲馬作狗吠。

賊怒以刀斫之不入彎弓自射之反中賊馬賊遂避之元旦賊僭登殿受朝賀忽見道士狗皮執笏立班中令人縛主道士作狗吠則城中狗皆吠吠聲震天對面不聞人語賊乃退道士亦不見陳定九鼎曾爲作傳

狗皮道士不知名以皮爲衣狗爲聲乞食成都偶一吠城中百犬皆吠驚忽聞獻賊前騶至突向馬前作狗吠賊怒彎弓射不入反中賊馬馬立斃是時獻賊僭稱皇百官拜賀如朝堂忽見道士立班內狗皮執笏隨班行獻賊由來狗天子一時百官狗而已道士以狗爲詆諧

反借狗皮整綱紀嗟乎狗皮尙把賊爲戲豈有人皮反
畏避君不見驅賊入蜀楊嗣昌人皮不若狗皮良

青羊宮

傷蜀士也賊詭稱開科用軍法發遣後至者誅
及至盡殺於成都西門外青羊宮凡二萬二千
三百人筆硯堆積如山又開武科取狀元張大
受寵賜無比三日闔門盡誅

文人怪事竟至此二萬秀才同日死宮中筆硯堆如山
門外浣溪血成水玉石不分盡遭戮若此焚坑禍尤酷
卽今元氣雖復還天黯猶聞酸鬼哭富貴如浮雲儒冠

解誤身君不見當時狀元張大受三日榮華萬年臭

兩橫行

誰家兩橫橫閭里一橫肆行一橫耻冤家狹路忽相逢
血流五步當場死君不見李熊爲盜鄴中豪轉禍爲福
官職高又不見韓信能受胯下辱終拜王侯享大祿丈
夫只宜五鼎食何須五鼎烹朝廷所需正爾輩安用爲
人報不平方今四海正清宴寶刀不用明如電三橫變
作一忠臣昔年周處是何人

囑嚕曲

并序

頌黃制軍也 囑嚕本音國魯蜀人呼賭錢者

通曰咽嚕皆作平聲如曰辜奴行常帶刀短曰
線雞尾長曰黃鷄尾皆象形而各內分紅黑書
曰紅錢如剪綵割包之類夜曰黑錢如穿墻鑿
壁之類或三五成羣或百千成黨少則劫奪孤
旅多則抗拒官兵蜀中爲害莫此爲甚非斬草
除根久必蔓延公名廷桂漢軍自公制蜀此輩
斂跡及去無不望公再來也

黃鷄長線雞短青天白日兵戈滿黑錢去紅錢來山橋
野店雞大哀殺人不償命皆昌古名姓夜來假面劫鄉
民平明縣堂充保正刀爲益州劍爲關天胡不將此輩

戰安得再來關內侯盡使帶牛兼佩犢

鳥生入九子

鳥生八九子啾啾鳴樹巔一子始能飛遽樹爲翩翹衆
子妬先達叨啁進謗言老鳥中先入不使棲巢間一朝
不知處沒入青雲端衆子怒且詈不報養母恩那知日
復日衆子不踐言有翼生我身各各爭騰搏東西紛飛
盡年深竟不還空餘枝上巢風雨日摧殘老鳥在其間
悲鳴饑號寒朝來一鳥過視之心爲酸饑爲啼蟲食寒
爲蔽羽翰乃知是前子終始戀本根當年倘不去寧得
身膚完雖然母有託坎壈多憂患嗚呼入九子鳥生良

實難

拉馬行

客行至縣城城外聞拉馬云奉上官票行裝且須下縣
堂擊鼓點馬夫縣官排衙吏傳呼里正如狼差如虎馬
瘦如狗客如奴富客競輸錢汝馬暫免牽貧客無錢聊
守坐公文急迫當忍餓却看驛馬肥於羊沙草嚼自
徜徉借問此馬誰所鞚但云官府出門用

圈墳嘆

松栢鬱鬱中有墳豐碑隆冑高南村朝來不知誰氏子
買莊恰恰鄰墓門子孫雖貧基宅在寧肯將墳當田賣

言集卷一
眼看地面屬他人不許麥孟親觀拜道逢官府率衣哭
官解長繩一丈足縱橫十字套爲圈圈出不許後人贖
君不見寒食家家上塚時烏鴉銜肉啼高枝烏有母兮
枝有本君家亦有塚累累

上之回

上之回自泰雍雲君岳祇海王瀆伯厭靈來同百神駢
集太乙貺翠羽金支闔竹宮上乃南觀神洲北眺芒嶺
東臨渤澥西望舊禮龍光日浴迫紫舌黃支頭飛鼻飲
咸追風駕霧以朝東星斗交羅光粲粲瞻雲就日來何
從上不回兮心方神上之回兮樂無窮

巫山高

巫山高高入雲雲中十二峯五色何氤氲琪花玉樹紛
難詳遙見碧城開天間黃金爲門白玉牆中有雲鬟明
月璫含情弄態如相望亦猶藐姑射山旁飄飄似仙雲
中翔陽臺何山無斜陽爲雲爲雨山之常底事誣山誣
襄王

烏夜啼

團團桐陰綠窻開香闌少婦臨妝臺昨夜夢見征人回
枝枝寒烏啼不已兩情未訴忽驚起玲瓏亂落淚珠子
問烏知郎歸不歸啞啞似不管是非恰欲打烏烏已飛

猛虎行

采薇于山口暮苦饑猛虎當道我不得歸解一再拜涕泣

黃馘骨立膏粱之家而胡不食解虎曰啞啞所忌爾輩

腐鼠何校鬼攝其氣解我則已矣毋爲狐媚南山之南

馮婦日至解四

來日大難

來日大難馬瘦衣單出門何所之撲面風沙寒道逢故人相對無語車驅竟去泣涕如雨高軒駟馬去者誰昔年破屋聲啞啞我若乘車若戴笠他日相逢任君揖

少年行

馬蹀躞車轆轤紛紛陌上人相逐誰家白面年少郎
翩跹侍從紫遊韁身列羽林建牙纛臨門檠戟生輝光人
生富貴何足羨過眼豪華倏飛電翻雲覆雨事何常生
死炎涼一朝變君不見郭外纍纍何代墳白楊千尺噪
雅翻誰人昨拜千鍾祿還向墳前起大屋

子夜四時歌四首

妾心如柳樹郎心似楊花柳樹長在戶楊花不在家
纖手弄團扇念歡不任口團扇妾不離妾已棄君手
天上會牛女明日仍間隔如何妾與郎不及會七夕
郎從西北來圍鑪暫相戲願郎心常溫莫改寒時意

言
一
嶽木論

嶽木嶽木風從中出笙簧笙簧言從口揚嶽木尚有因
笙簧不可當初或疎兄弟漸乃離命孺陸平曾參殺人
母反走古今間人只在口

艾如張

雙鳬俱飛欲歸稻池道逢鸛弋傷我胸臆鳴鼓澤中不
知何處張弓視鳩雄雞飛去

雨霽懷明經計寧邦

夜涼如水水平池倚檻思君君不知雨漲江頭聲瀟洞
風篩潭面影褸褸幽人祇愛觀周易名士原須讀楚詞

種菜閉門非我事秋來並約桂定相期

苦雨行

雲滌深林色如墨勃鳩呼婦林間匿倏爾狂風捲地來
簾笠無功雨似織憶昨緼隆黑蜨凝共禱田神火蜨騰
龕中蜥蜴擊欲死龍無點滴救生植邇來天漏誠有之
媧皇不補聽其缺田禾皆作浮萍飄禹王何以畫溝洫
陰陽在天雨有數社鬼母乃失其職我雖無田耕石硯
亦有破屋遮寢息書生一命本螻蟻徙穴返遜微物識
願天憫此菜色民撥雲一露青天色我雖餓李亦何憾
免使窮簷戴盆泣

雨夜和郭秀才有聲韻

晚來驟雨忽翻盆，悶向精邱倒一尊。
正憶高人居北郭，忽同素友到南村。
論詩務使陳言去，酌酒全餘舊醖存。
洗淨鉛華出新穎，天公此雨不無恩。

計寧邦送木筆盆花

名花結構出天工，蟠就辛夷最鬱葱。
作筆他年書澹墨，奪朱此日惡殷紅。
王維館裏知誰到，杜甫詩中落已空。
獨有好奇老居士，縛毫不令放東風。

雨過寧邦覓花歸，栽江漲不得渡。
憩曹錫賢林丈，久待乃得濟暮歸。
爲作長句。

章山詩集卷二

綿州李調元雨村

已已

鹿頭關謁龐靖侯墓祠內並祀武侯

江鎖雙龍合關雄五馬侯益州如肺腑此地小咽喉事
急爭雞口時平失鹿頭至今松柏塚風雨不勝愁
誰言此州小曾有鳳雛來首獻三條計洵非百里才生
無慙驥足死合遣龍陪一自星飛後千山澗水哀

漢大司農秦宓故里

官本司農秩人呼祭酒村兩朝天有姓三造地無存城

郭綿江浸人家洛漲痕永安遺命日應愧此中魂

過新都謁楊文忠公石齋先生及文憲公升菴先生墓有感議大禮事爲作長歌

備禮乃成體嘉靖不信前制禮考書乃知初嘉靖不讀前史書武宗前星旣失耀兄終弟及下明詔旣難隔代考孝宗又難二統逼武廟一時議禮集朝堂俱守定陶與濮王請考孝宗叔興獻皇帝曰咈朕心傷獨有待對一舉子不與漢哀朱英比請考興獻伯孝宗皇帝曰俞朕心喜可憐衆君子不敵一小人新都朝去位永嘉父輔臣大禮未成大獄起撼門慟哭在此舉牽裾首跼

罪魁遣戍百人子若始漢議諸臣旋賜環惟有金蘭
不旋至今文忠及文憲豐碑終見高遺阡闕五百年
已更事久聊作平心論天下豈有無父人况爲天子亦
有親與獻旣爲天子父忍使其父爲子臣漢宣不皇父
亦嘗考皇孫光武不皇父亦嘗考南頓旣考與獻卽當
皇亦猶王季同文王邸王昔稱景泰帝懿文亦得爲康
皇譬如遙除官不過追贈諡但當曲體罔極私無預朝
廷大名器所懷考與獻則疑前無孝並嫌皇與獻則疑
躋武廟不得世宗延其嗣反名獻皇亂統號舉朝所以
共沸騰百官所以愈暴讎世宗亦乏錫類仁銅如元祐

諸黨人璵等輩何足責只爲功名臭萬春臭亦難悉
數豐坊又踵武嚴嵩附和號睿宗議禮又用李林甫

雙桂堂楊升菴故宅卽今廳署雙桂殆補植也

留耕家世福雙全豈料人闌酒亦闌仕宦從來真傀儡
家山何處望團圞青蛉夢斷啼鵲易金雁魂歸化鶴難
果有堂前雙桂否丹心丹桂定俱丹

平定金川恭紀八首

勇序

乾隆己巳十三年十一月癸丑 上命大學士
傅恒爲經畧督師赴金川軍營十四年正月初
四金川蠻酋莎羅奔郎卡率衆投降奏聞 上

命班師二月丁巳還朝庚午瀛臺賜宴封經畧
大學士傅恒忠勇公提督岳鍾琪封三等威信

公

蠶叢天險控西隅雜谷羌夷種落殊回鶻未通唐職貢
冉駝終入漢輿圖連年議撤金城戍此日重開玉塞圖
聖世羈縻有深意諸戎甘自觸天誅

繩橋窄複正懸兵帶索牽援絕嶺行石壘豎旛蛇有影
碉房吹角鴈無聲邛川雪霽姜維廟瀘水烟生孟獲城
眼見旄頭天際落窮荒極目瘴雲平

羽書飛騎接長安夔道縈迴路百盤誰使行軍殊細柳

遂教對簿緩樓蘭當年構怨哀鍾鄧

謂諷親張廣泗

此日同謀

憶范韓聞道軍前方賜劍應知國法總難寬

何須小醜刻師期自有高牙樹月支十路不需諸葛扇
百蠻爭避岳家旗寒侵虎帳傳餐早霧暗龍堆出探遲
何處金笳聲倍壯元戎早報獲酋夷

捲田銜校度雪山重兵振旅入荒蠻軍聲欲壓沈犀驛
虜膽先寒倒馬關洗甲營前星燦燦受降門外月彎彎
廟堂早建凌烟閣竚待元戎奏凱還

非關狡窟計終窮原有懸弧在掌中日落紅崖森壁壘
風高黑水聚滕幢火驢已見樓梯破流馬何愁棧閣雄

便築三城當絕域降王萬里使車通

岳公奏准由黨其水陸並進金匱長糧乞降

妖狐伏處望嵯峨無復征騎鳥道過已見金戈清大漠
還聞王斧畫沙河張騫槎上葡萄少馬援囊中薏苡多
從此白狼應人貢好將朱鷺譜鏡歌

千載聲威感白題九霄相率上丹梯垂楊綠到花卿廐
市杖青連竹女溪外譚初著郫縣酒內蠻先獻普州梨
陽關守吏如相問家在邛崃西復西

綿州越王臺故壘

生爲磊落人復遊磊落州不見越王臺但見清江流
當年唐帝子錫土守此邱美人捲珠簾笙歌夜未休鳴鳶

忽罷舞江山生暮愁惟有江邊月曾照城上樓

杜少陵詩錦州

州府何磊落陸放翁詩磊落人爲磊落州

由白滄瀾渡東津

出郭眇遙岑過渡得佳境長風走溪聲落日橫塔影入
林路愈細村口光耿耿髣髴別有天鷄犬自閭井不見
打魚人但見釣魚艇

自東津步至西澗

烟霞何重疊草樹復葱蒨出澗聽萬籟入谷駭百變大
吠隔林聞鳥啼深竹見懸崖暮樵出細逕歸僧慣道心
觸幽澗孤詣超清院獨往雖暫歡多累恐寡便濯足洗

塵心庶脫流俗牽

莊富樂山

但覺林巒密不知烟霧重緩步入修竹夾道吟長松細
鱗漾深澗矯鶴盤蒼穹遙指精舍好遂登最高峯當時
龍戰野此地等蒿蓬富樂獨入眼方知使君雄事歷千
年劫空餘一畝宮惟有古源泉日夕鳴悲風

出富樂禪林至西山觀宿

微風水際來不覺山色暝遙望檜栢林遂上杉蘿逕禪
榻殊清冷空齋恢雲性老僧喜芳談元理滿清聽松濤
何處生助此清夜興

西山觀觀石壁所刻揚子雲真像歌

四山冤鳥清晝聞攀藤覓路松顛分中有石像鬚眉古
擘窠書題揚子雲嗟公吾蜀詞壇祖前無相如竟誰伍
惜未抽身居攝年至今後人稱黨羽笑公口吃談非便
我爲公辨當云然當年石牛符命起井邊鬼夢呼天子
市上小兒皆王侯獨君三世官不徙可憐閉戶真泊如
可憐著述甘窮居倘使竄名緣獻匱肯教投閣爲校書
君不見虞帝七首竟無憑漸臺美人呼不應銅人夜徙
悲長樂累恩曉望哭延陵奸雄氣焰空復爾藏熱收聲
正謂此早知一跌能赤族悔不來泰太元理始信蚪螭

騰九閼龍蛇不蟄必湛身跟前桓子真知己身後侯芭
是解人今過西山讀書處令我流連不能去拜罷靈祠
宿烏吟似訴長歌明我心君不見佐命劉琨何其榮禍
王猶看太白星

庚午

練時日

練時日兆精禋張瓊案升柴燔彰畫黻幸蛻疇通肝蠻
睎神休靈來格天香滿紫微開軒星纂儼九霄矗黃旄
戛雲和鳳笙歌靈來御扶金軒撫天僕揚六鑾驟如舞
翔高壇靈來始羽節弭總容衛靈瑤玕百靈賓鏘玉珮

肅濟濟靈來止駐靈輶黃龍蟠雲亭亭登黝牲達薌蕭
華鐘鏗雷坪坪靈來安陽位美顧華堂色有喜靈之賡
舞羽幢紉蘭芷雲錦裳歡良夜進瑱觴靈來饗流譽光
眷元祐福無疆舉祥飈倏而翔

帝臨

帝臨圓壇肅穆靜對元哉樞紐宅中圖大四序均調風
和萬籟機衡不爽時雍道泰庶彙咸若率土來會陰祗
協贊儼承帝謂神靈既揚簞澤無外含章居貞皇祚允
賴明德維馨崇薦斯在

青陽

百陽在木棣通族出氣始和淖園煦釋物群雍蠢闢包
裏風俗呼吸浸潭旁薄斟酌有微敬始息長祈福羊麥
堪歆衆生欣樂

朱明

朱明御火南訛以平龍星體見斗樞中繩進及天稷雲
漢潛萌羔犢生息澤流石精德懷陰暘鬱陶心凝鷄救
以饗式表虔禱

西顥

西顥行金指隅晷促炙陽下露渟波澄宿水香擢蒨羣
籟振木有懷任象難歛成孰雲物觀美兌景靈肅麻犬

斯陳以介景福

元冥

元冥正水履長在御司智莅坎星迴晷度口至峻狼北
陸凝互沉潭見心雪霜老樹八蜡順成農穀息務蠹黍
是薦來歲允祚

遊雲龍山

雨歇數峯清斜陽下喬木谿西聞暗泉夜氣侵叢竹何
人嘯空林冷然出幽谷

上山賦採薇攜鋤過別墅薄靄遙岡來蒼然下平楚時
聞人語聲不見人行處

支筇步清溪，翠嵐出林表。空山一葉聞，驚起雙栖鳥。飄然下層巔，前村樹煙渺。

松風谷口來，吹客上峯頂。紺宇出林端，遂達招提境。疎鐘時一聲，微見寺燈耿。

谿迴樹色濃，日暝磴光暮。蒼然白雲歸，遮斷前山路。時有採樵人，長歌隔林去。

苔華石氣清，雲砌寒蟲響。古道瀑侵衣，雲洞坐幽敞。山深夜不眠，孤月樹杪上。

辛未

八陣圖歌

韓愈

有客騎馬來新都逢人指點說彌牟森然魄動下馬拜
武侯八陣遺荒墟緬古軒皇授神術布軸抗衝森紀律
卦義微叅數更靈井字成形制尤密蚩尤殲戮著奇功
千載獨傳諸葛公五行操算由天授六花變幻非人工
是日高壘狐兔嘯四面林樞驚鶴叫車廂折衝鳥翔火
飛翼浮沮龍騰跳橫天鶴列儼成行匝地魚麗不可釣
憶昨三聘翩然悔茅廬本爲蒼生起身比管樂殆過之
心折關張良有以圖成犄角誰能攻綸巾羽扇何從容
畏蜀當年同畏虎得狗如今羨得龍惜哉出師方盡瘁
內蠻跳跋分其勢車蒙未得驅中原鋸齒空教吞虜地

事壞誰當挽天迴心傷不獨指星墜至今怒氣鬱沙麓
屢遭剗平仍磔卓戰場殘廢爲民田往往犁邊拾古鏃
月黑時聞金鼓聲天陰疑有鬼神哭君不見棋盤市夔
州城今人不少能兵者黑白杯中總不清

將進酒

我不如張校尉李輕車博取封侯高建牙復不如談大
衍彫龍奭手攔相印爲說客不文不武究何成旅進旅
退終無益東家車馬闌門前西家歌吹聲沸天壺中有
酒且須酌莫教酒盡求人憐華亭鶴唳悔何晚咸陽牽
犬事不返地下應無賣酒壚世間何事擊空瓊人心如

固安可窺旁人側日君不知大江流水有窮日白衣蒼
狗無盡時我當酌君當斟呼牛呼馬隨君意清聖濁賢
知我心

結交行

我生豈不願安貧捉衿見用羞煞人我生豈不願求富
金穴銅陵不牢固我聞士可殺而不可辱寧以直禍無
枉福君不見伯龍欲爲十一方有鬼撫掌笑其旁

君馬黃

君馬黃我馬不如君馬良金羈馳紫陌玉勒點秋霜朝
馳崑崙夜幽燕簫雲一旦飛上天天門九重多罡風忽

然吹落塵埃中孫揚掩面救不得韓幹欲畫難爲工回
看我馬非龍驤徐徐緩步遵平康君馬黃君馬不如我
馬良

丈夫行

丈夫持此身七尺安能終日心偈仄何不躍上天衢游
汗漫九垓馳八極不然萬里邊庭開請纓仗劍從軍臺
巍茲國邊拍騎去烏思藏裏斫頭回胡爲跼蹐藕穴裏
出亦不喜入不喜平生事業竟何成卑哉著書滌公子
美人行

青春華宴張翠帷吳姬越女裁冰絲玉顏纖手傾玻瓈

珠翹摘阮爲君娛爲君娛君莫辭君莫辭妾當舞君不
見美人轉瞬亦黃土

壬申

田家四時雜興

春至催耕鳴薄言向田里戒婦預爲黍呼兒先載耜荷
鋤帶晨出晚歸泥滿趾田礪藉人力糞壤須肥美眷言
興農事努力自茲始

遠屋桑柘稠掩蔭虛落翠新麥已登場餘蠶猶待飼青
秧及時移田婦攜餉至杯盤俱瓦缶初不擇精緻高樹
席草茵壠上各飽醉睡倒不自知安知天與地

種稻已成穗黃雲倒平原村村耒板急人牛一時喧腰
鎌既穫秬碌碡卧場園得穀甫入廩科吏夜打門丁男
輸租回優游且晚飧

嚴冬百草枯鄰里及閑暇田家重農隙翁媪相邀迂列
坐酒三巡或起四五謝盤薦園中蔬壺傾家甕醅酣呼
遞相酬笑語雜悲咤客散送柴門月色耿涼夜

成都雜詩

春到城頭花木饒雨餘始覺鳥聲囂旅人飯罷渾無事
閑上東門萬里橋

當年遣祭望旌旄聖主賢臣異代遭金馬坊前空片石

言集卷二
鄉人猶自說王褒

市橋西畔相如宅滌器當時果有無
今日琴臺生綠草誰家少婦復當爐

校書段閣事堪哀想見侯芭問字來
我欲墨池尋舊蹟縣廳深閉叩難開

賣卜垂簾雜市闌君平遺跡已摧殘
千秋一片支機石今作巫家黑虎壇

紛紛割據竟何存天府休言控劍門
試向籌邊樓上望暮雲低處李雄墳

烏鴉啄肉紙飛灰城裏家家祭掃回
日暮烟村人不見

薛濤墓上一花開

青石橋訪韓三

把袂尋春一騎乘
管絃深院許同登
地當青石東三巷
人住紅樓第二層
曲誤周郎還屢顧
句敲賈島輒蒙稱
年來自笑顏唐甚
爛醉狂歌漸不能

環翠軒

偶從環翠軒中坐
無數琅玕盡透軒
雲氣欲來庭院暗
雨聲先向竹林喧
天光不照因枝蔽
地仄頻爭爲葉繁
我本書生思靜默
幽禽何事獨多言

梔子花

章山詩集卷二

此樹家家種非蘭亦號林不風香透鼻有日贈同心花
賤何須賣苞含便可簪曉來猶有露着屣是誰尋

佛桑

洋外扶桑樹川中木槿花開當五六月豔照兩三家慣
作風前墜翻因雨後斜愁雲能護惜惟見海東霞

南村曉行

白雲高捲碧天飛曉起風涼雨亦稀烟際早聞人叱犢
炊餘時聽婦呼豨花梢炯炯晨曦照草色濛濛夜露晞
獨有庭前紫荊樹屢因分析少光輝

雲龍山

雲龍蔥鬱處家樹擁烟鬟江似弓絃直山隨扁担灣地
因兵燹失天念祖功還試看松楸宅牛眠不足攀

喜琛芳昆仲至

陋巷原無過客騶窮居忽得二難遊風搖竹尾鳥猶宿
日落花心蝶尚留到處身如巢幕燕相逢心似浴波鷗
曾聞空谷楚然喜今日同君頗似不

贈蔡製亭

錦生
秀才

門前剝啄騎頻嘶早有高人拄短藜翠竹環軒新雨過
綠槐遮巷夕陽低羣空伯樂知良馬舞罷劉琨爲聽鷄
此日一尊聊復醉人間憂樂總難齊

蛺蝶花

蛺蝶來何處花名偶混淆紅顏時謾撲黃鳥或偷捎肯
入葦周夢難同魏子嘲最憐風雨猛猶自占柔梢

童山詩集卷三

綿州李調元雨村

癸酉

清明在成都作

清明郭外柳鬖鬖車馬如雲有墮簪
莫向碧雞坊裏去遊人多在百花潭

將之姚江留別范大

士顯
輦大建昌

萬里爲官累不輕舉家儼吉起綿城心如灘急船初動
眼看山飛浪欲迎不共蝸居角蠻觸要從鰲背上蓬瀛
此行頗慰柔弧志負米兼懷負笈情

早發涪江

清江滴空翠曉晚渾不辨月光水面微樹色烟中見舟

人貴早起開柁迅如箭晨興未盥沐先戒束棕薦以舟子

薦爲舟具不敢遽開蓬但聞槳聲濺川江使船皆用槳奔浪聽漸近

倏若已後殿起來問水程已過幾州縣一葉凌滄波千

里穿白練萬山若奔馬飛騰捷驚電年輕事未更江州

莫吾玩

渝州登朝天城樓

五鼓城頭畫角催四山雲霧黯然開三江蜀艇隨風下

萬里吳船捲雪來剩有小舟來賣酒更無詩客共銜杯

少年壯志無人識袖手寒天寂寞回

舟中二首

扁舟一葉輕濛濛晚烟裏白鳥溯江飛時時點秋水
有寺懸崖巖蒼然雲滿樹忽聞清唳聲不知寺何處

晚泊忠州

雨不放山出雲偏隨堞開江依巴字走峯學篆文迴水
冷光難定山空響易哀孤舟泊何處曾記樂天來

巫山縣

小小巫山縣雲峯密似麻天寬才一線地仄控三巴瀑
掛山山樹溪流處處花瞿塘天下險莫更說襄斜

詞杜少陵祠

飄泊誰爲浩蕩遊當年杜老此淹留一朝詩史爲唐作
萬丈文光向蜀留風雨茅祠仍見拔雲烟灑宅尙含愁
艱難我亦棲遲久試問秋懷得似不

歸州謁三閭大夫廟

汨羅遺蹟峽江頭欲賦懷沙淚已流腸斷女媧空見
數窮詹尹復何尤祇今三戶餘秋草剩有千山送客舟
愁絕滄陽南浦上年年杜若老芳洲

荊州

楚水瀟瀟下巫雲蕩蕩開天浮烟樹去日帶早帆來鳥

下渚宮遠入宣沙市迴城邊空幕府無復舊軍臺
荆門雄七澤峽口控三巴灘勢拖狼尾關形扼虎牙荒
原淪戰骨古木帶昏鴉漫話孫劉借如今總一家

黃州晚泊

赤壁煙初合烏林月欲升鳥投遙岸樹人語隔江燈夢
去家疑近愁來枕自憑天涯遊子意寒夜總難勝
夜聞江上吹笛

兩岸風清靜中天月影流梅花何處落一半在孤舟

大風渡鄱陽湖

平生浩蕩不羈志忽有奇熱眼底來日湧波濤連地動

風颿檣櫓自天迴山趨湓口十層合水遶潯陽萬里開
莫道天涯便飄泊此中還有濟川才

信州早發

解纜月初墮滿江烟霧流眠鷗知讓客飛去別灘頭

七里瀨

烟江漁互唱小艇人相語峯回不見峯路轉疑無路遙
見山下人漸入山中去

會稽懷古

千巖萬壑越山川到此欣然欲學仙我未功成少西子
那能便泛五湖船

甲戌

鳳山精舍

淨室朝來別樣清，無窮幽趣眼中生。
一花開處蝶雙去，萬竹叢中鳥數聲。
沙觜樹排貽畫譜，山腰田界設棋枰。
平生酷有烟霞癖，恐類巢由便不情。

登寧波城樓

雉堞凌雲脚下開，鯨波帶日島邊迴。
江中船出海中去，洋外帆從天外來。
地近東溟先見日，雲垂南浦忽聞雷。
不知何處蓬萊是，遙看滄滄貝闕開。

題俞醇六夫子小照

曠達如夫子柴門半結蘿師家鄧縣城南十里有田鶴二頃臨江智山村景甚幽
馴隨意放鷗靜與心和但有退儒至全無俗客過草生
青靄蒲松老白雲多是竹邀同看逢花必共哦從遊欣
霄下歸詠敢辭歌

餘姚蓮池夏日晚坐

網涼何處好堂後有紅蓮草裏青蛙國池中白鷺天最
宜蒲扇坐恰稱竹床眠又見奚童報書燈滿院懸

謁曹娥廟

哭父沂江湄投江竟得屍名齊列女傳孝重外孫碑風
過猶聞泣雲行似見隨英靈今在否千古愧鬚眉

蠟梅

東風昨夜有機事，開破封書第一九。
却被蜜蜂漏消息，先差蠟鳳報衙官。
枝枝蕊似離黃玉，陣陣香疑麝紫檀。
道是梅花君不信，如何臘月並衝寒。

二月二日孝廉施樂莘

禮畔

同遊西湖二首

不因攜酒到湖邊，誰識東風滿畫船。
燕剪分開紅杏雨，鶯梭穿破綠楊烟。
山如屏幃雲中展，天似玻璃水底懸。
却笑香山老居士，風流早占大蘇先。

十里湖光一望遙，無邊春色向人撩。
僧言攜鶴來三竺，客約聽鶯去六橋。
蒲葦有聲漁艇去，芡菱無路酒船招。

數聲玉笛人何處曲院深荷有蕩橈

同汪孝臣張斐成泛舟西湖四首

新晴慣聽鳥聲交載得歌吹綠水均驚起沙邊雙白鷺
一齊飛上杏花梢

誰家小閣傍山斜屋角桃花間李花春色壓簾門巷寂
鶯啼入隔牆家

半湖飛霧半遊塵日色山光總是春忽聽孤蒲船去疾
放歌知是採蓮人

漁人舟過水風腥細雨斜收柳色晴冰上樓臺回望遠
斷虹多在別溪明

汪張二君皆吳興友也孝臣工詩擅長句有遊天台集斐成上書爲

君寫刻治
紀畧二卷

丙子

常州道中

鎮日只居水今朝始見峯雙鳩烟外樹孤鶴雨中松小
市人聲雜高城返照重惠山何處是杳杳一聲鐘

丹徒縣

問路丹徒縣雲帆第幾灣風來潮似漲日落岸如山海
燕銜花過沙鷗傍草閑江南真可樂竟住未須還

郊縣

曠野麥苗清楊花撲路塵迎人雙雀墜失伴一鷗鳴地

豈峨眉近山如鳳翅迎青帘誇酒好細買一壺傾

武功道中

高原秋雨後古縣夕陽邊
牛自眠桑下人多在麥田
一村鴉點點幾處水涓涓
更向終南望天梯莫可緣

夜宿寧羗州

萬壑千巖裡蕭條斗大城
三更驚虎入四面盡猿聲
雨驟林先嘯風狂澗亦鳴
曉來山水漲何處問前程

朝天關登舟至廣元午炊晚至昭化縣嶺道中得

絕句四首

抖擻衣間萬斛塵今朝見水倍精神
我聞更有仙人出

疑是桃源欲問津

山神知我愛看山雨洗諸峯獻好顏惟有白雲偏不肯
只教窈窕露雙鬟

石巉巖處是龍門上有雕鐫萬世尊千佛名經龍足許
莫令燒尾却回奔

嘉陵漁父水中居偶得嘉州丙穴魚我道不如縱他去
爲儂遠寄越中書

榜發下第買舟將南諸同人攜酒餞行留詩作別
纔得歸來又買舟相攜話別各言愁一時氣味直如醉
平古文章肯類優楓葉初紅是新染蕉心含綠頗全抽

他年伯樂如垂顧看我來修五鳳樓

將復至浙留別唐堯春

樂宇

行李依然逐逝波年年爲客走關河
黯然一別魂銷矣去也相看喚奈何
世上憐才休恨少平生失學本來多
天公有意君知否大器先須小折磨

潼川夜泊

荻蘆花老撲船窗信口巴歌
不敗腔多謝橘亭山下月
伴人今夜宿涪江

夜泊巫山

自入巫山縣生涯總是灘
一江春水怒萬樹入山寒
茶

老忙癯婦城孤卧縣官高堂門尙倚旅夢敢云安

峽中三首用范石湖韻

峽山江之濱嵯峨疊亂石怪狀難殫述醜態恣驚啞亦
比牛火紅魃類鼠膠漆攢疑蛤殼聚脫似龜背圻其高
若垣墉其牢若瓴甃或似奮鯨鬣又如曝鱗骼倒垂掛
霜蛻壁立支雲錫霞蓋朱紱縈嵐染黃裳襞蹲踞虎豹
威杈枒熊羆力班班鵲鵲眼細細蜿蜒跡覩茲光怪姿
窮我真搜癖大哉造化功狀此崦嵫色經紀有營腴嘯
吼肆撻擊厥初誰搏沙弄嬉空潭側巧力多勞歎鍛此
千片碧無乃神禹功譜此大荒籍平生多倦遊奇石未

章山詩集

卷三

八

盡覲謁來巫峽中刺眼紛如積我家南村南舊有三畝
宅縱有竹林趣未稱泉石國何當抱玲瓏歸家細鍊液
顧猶在孤舟遠作天涯客

平波行峽底遇石則斗變盡日防暗灘盤渦遞隱見始
覺中流靜蕩駭忽綠間少頃便墳起旋繞復橫貫初如
拖青紫漸似翻白練謾謾疑湯沸齒齒若磨旋鯨牙吐
浮沫魚尾掉碧暈山飛岸忽高地動水相眩平鋪若熨
帖上冲忽噴噴轉瞬成頰窠盪摩作股扑突然殊叵測
安定乃慚汗舟子持篙立勇若操水戰撓折還衝突蓬
飛怕終轉捩舵幾併入招竿幸未斷中窪更拿俄半陷

尤加牽瑄呼捷過雨顧盼快驚電愀愁傾跌屢防維設
法徧我來立船頭常有浪沃面不少扣舷歌翻笑客舟
亂陽侯景自容豈便憎吾慢設機恐人心無乃太相玩
吾壁不可投按劍力猶健

昔年過琵琶亭籬內有主人相迎款洽備至今再
過之邈若矣爲之撫然

昔年江畔維舟話今日亭邊獨再經只有垂楊無勢利
向人猶自眼垂青

神鴉行

富池廟祀西陵守廟前神鴉傳已久往來索食不避人

拋接高低皆到口我怪其異欲彈射其奈黨羽紛前後
人言此是甘公魂精靈不可機械取我思將軍英烈氣
關公尚避曹瞞走安能幻作羽毛身嘖嘖向人求肉酒
嗟爾神鴉應知足藉賴靈威惠實厚君不見權門索賂
多走狗憑仗威福無不有

甘將軍廟

名將爲神信有靈當年戰地血猶腥營前鼓吹聲方厲
陣上傳杯酒未醒日漾銀濤疑被繡風搖鐵馬似聞鈴
代函古誼今寥落空望遺威奠醪醑

魯肅墓

在鎮江府城東

奮武遺墟卧石麟江東霸業已沉湮晚年空笑求三郡

早歲曾經指一川山色凝愁連北固水聲流恨入西鄰

借荆能落曹公筆切勿輕看冢內人

吳志本傳後備諸京見權求都督荆

州惟肅勸權以之以拒曹公公聞權以土地業供

勢作書落筆於地

金陵懷古

大江劃斷兩邊天幾度臨江意黯然折枝至今恩謝傳

投鞭終古笑符堅雪消水榭聞吹笛日落新林有渡船

試問從前賦詞客誰能寫盡六朝煙

登燕子磯

紺宇凌霞不數重迴欄已上最高峯江邊一雁來殘浦

言集卷三
城上千鴉亂夕春靄靄黃拖淮岸柳深深綠滿孝陵松
劫灰自昔關天數請聽寒林午夜鐘

金山

自是人間第一山孤峰湧出亂流間瓊樓倒映波中影
玉塔高盤水底鬟吳楚萬家歸掌上江淮兩岸落眉彎
停舟漸俟風濤息竚看帆檣歷歷還

楓橋夜泊

初月上平林微風動高樹驚起沙上禽飛過楓橋去

錢塘懷古

宋家事業已全銷漫把餘杭說故朝江上只應寒月照

湖邊偏見暮雲饒。王師不抵黃龍府。帝子空餘白馬潮。
日落諸陵何處是。冬青樹老雨瀟瀟。

弄珠樓

畫欄無際俯沙洲。樹色沿郊一望收。幾處鐘聲浮綠浦。
誰家笛吹咽紅樓。蛤非如蚶時時有。蛙亦名雞頓頓羞。
向晚湖風促歸去。滿船明月漫相留。

題馮孝子太行扶櫬圖

奉

大人命

太行九折古羊腸。孝子從來此勒轡。長恐登危兼服闋。
何堪扶櫬更他鄉。天寒澗鬼啼山底。日落林烏泣道旁。
罔極深恩何處報。此圖休遣挂吾堂。

硤石舟中

綠野秧初遍青堤荻正生方疑一水狹忽見兩峰橫日
落樹無影風來浪有聲海昌何處是早見一拳城

海昌望海

雲與地相接水將天欲吞雙輪浸日月一色混乾坤島
嶼竟無影波濤畧有痕平生夸海口到此策吾言

嘉興逢汪大孝臣以遊天台詩賦見示時余將歸
劍南作長歌志別

憶昨同君太湖醉狂歌大叫姑蘇市鶴鷗搖船鄧尉山
虎邱走馬靈巖寺春光淡沲酒盞濃鞭絲帽影隨匆匆

浮雲聚散不復問，逐流縹緲分西東。我歸西蜀還飄泊，
君向東陳東蕭索。天台勝景誰能探，剡桃花同此樂。
茲山聳翠東南雄，赤城瀑布垂長虹。當年登高作詞賦，
中興只數孫興公。君家詩學冠江浙，氣壓滄溟前無伍。
括蒼洞口高題名，桐栢山頭訪前古。橋李城邊日欲斜，
巷北逢君坐酒家。興酣示我紀遊什，句句仍帶山中霞。
咫尺仙山不得上，覩此令我生惆悵。幾時重訪海門山，
醴泉瑤草知無恙。明朝一葦返家鄉，分手無端淚幾行。
極目江湖春水白，側身天地暮雲黃。

除夕

歲華已去不能招又見春光在樹條
淡白梅花先索笑嫩黃楊柳漸伸腰
人情念舊還如昨世事翻新祇隔朝
把酒圍爐度今夕好將風雪壓寒宵